



# DOMOWINA

## Jednanski porjad Zwjazkowego předsydstwa Domowiny za wólbnu dobu 2021-2025

### § 1

#### **Powšitkowe zasady džělawosće**

1. Zwjazkowe předsydstwo Domowiny nawjeduje džěło třěšneho zwjazka mjez hłownymi zhromadźiznami.
2. Zestawa, nadawki a kompetency zwjazkowego předsydstwa rjaduja artikl 9, wotrězki 1 - 8 wustawkow Domowiny.
3. Zwjazkowe předsydstwo spjelnja swoje nadawki z
  - rjadnymi a wurjadnymi posedženjemi,
  - džěłom prezidija po §12 tutoho porjada,
  - analytiskim a koncepcionelnym předdžěłom džěłowych wuběrkow a skupinow,
  - koordinaciju a integraciju cyłnaronadneho džěła we wothłosowanju z předsydstwami,
  - sobudžěłom sobustawskich župow a towarstwow kaž tež z druhimi zwjazkarjami,
  - skutkowanjom kóždeho jednotliwego čłona zwjazkowego předsydstwa w swoim towarstwje a w zjawnosći,
  - aktiwnym zjawnostnym džěłom wo zaměrach třěšneho zwjazka a wo položanju a zajimach serbskeho ludu.
4. Zwjazkowe předsydstwo schadźuje so po artiklu 9, dypk 7 wustawkow Domowiny znajmjeńša štyri króć wob lěto. Nimo toho zwoła so kóžde lěto klawturne posedženje. K tomu so lětny plan džělawosće nastaji, kotryž nimo terminow tež měštnosć a wobsahowe ćežišća posedženjow postaji.

### § 2

#### **Nadawki zwjazkowego předsydstwa**

1. Zwjazkowe předsydstwo ma po artiklu 9 dypki 4 do 6 wustawkow Domowiny slědowace nadawki:
  - a. rozsudzić wo prašenjach běžneho džěła Domowiny mjez hłownymaj zhromadźiznomaj,
  - b. postajeć ćežišća džělawosće a rjadować zawjazowace zamołwitosće za zwoprawdženje nadawkow,
  - c. přijimać prawidlownje rozprawy předsydy a prezidija Domowiny,
  - d. postajeć zamołwitosće a nadawki prezidija,

- e. rjadować wobsydstwo a financy Domowiny,
- f. přijimać a schwalić financne a hospodarske plany a rozprawy,
- g. wutworić dźělowe wuběrki,
- h. přijimać rozprawy hłowneho jednaćela wo dźěle zarjada Domowiny a postajić ćežišća dźěla zarjada,
- i. postajeć ćežišća dźělawosće Domowinje přislušacych institucijow a wotrjadow,
- j. přijimać rozprawy nawodow Domowinje přislušacych institucijow a wotrjadow,
- k. nachwilnje přijimać nowe towarstwa do Domowiny,
- l. nachwilnje rozsudzić wo nošerstwach dalších institucijow abo wotrjadow pod třěchu Domowiny,
- m. powołać a wotwołać resp. nominować zastupjerjow Serbow do/z gremijow a přijimać prawidłownje rozprawy wo jich dźělawosći,
- n. wobzamknyć dźělowe porjady Domowinskeho zarjada a Domowinje přislušacych institucijow a wotrjadow,
- o. powołać a wotwołać nawodow Domowinje přislušacych institucijow a wotrjadow,
- p. powołać a wotwołać hłowneho jednaćela a jednaćela Domowiny,
- q. wobzamknyć wuznamjenjenske porjady Domowiny, kiž njejsu z wobstatkom tutech wustawkow, a wolić člonow mytowanskeho wuběrka,
- r. namjetować hłownej zhromadźiznje po doporučenju změrcowskeho wuběrka wo wotwołanju člona zwjazkowneho předsydstwa z wólbneje funkcije,
- s. rozsudzić na zakładže doporučenja změrcowskeho wuběrka wo přikazanym nachwilnym wotpočowanju funkcije člona,
- t. rozsudzić wo přiwzaću nachwilneho złoženja wólbneje funkcije na zakładže podaća swójskeje wole.

2. Dalše nadawki zwjazkowneho předsydstwa su:

- a. přihłosować namjetej wo změnje městneho plana struktury zarjada abo wotrjadow Domowiny,
- b. přihłosować namjetej wo přistajenju abo pušćenju sobudźělaćerja wyše zaslužbneje skupiny 11 tarifa TV-L,
- c. přihłosować jednotliwym investicijam wyše 10.000 €,
- d. přihłosować nakupej abo předaću imobilijow.

### § 3

#### Posedženja zwjazkowneho předsydstwa

1. Wuradźowanja zwjazkowneho předsydstwa su po artiklu 9, dypk 8 wustawkow Domowiny zjawne. Wuradźowanja zwjazkowneho předsydstwa měli po župnych teritorijach pućować. Nowinski rěčnik Domowiny informuje medije tydžeń do posedženja wo wobsahach zjawneho dźěla posedženja.  
Zjawny dźěl posedženjow wusyła so jako livestream do syće, jeli techniske móžnosće na městnosći wuradźowanja to dowola.  
Livestreamy posedženjow maja znajmjeńša lěto přistupne być.  
Zarjad Domowiny ma trěbne techniske wobstejnosće rjadować.
2. Wuradźowanje dźěli so po potrebjce do zjawneho a njezjawneho dźěla.  
Zjawny a njezjawny dźěl posedženja matej so w namjeće za dnjowy porjad wupokazać.

3. Personalne prašenja maja so w kóždym padže w njezjawnym dźělu wuradźowanja a w njeprítomnosći potrjecheneho wobjednać.
4. „Nuprašowanja člonow Domowiny a hosći k serbskim naležnosćam“, „rozprawa předsydy a člonow zwjazkowneho předsydstwa wo dźěławosći třěšneho zwjazka mjez posedženjomaj zwjazkowneho předsydstwa“, „informacija k aktualnym aspektam dźěławosće zarjada Domowiny a Rěčneho centruma WITAJ“ a „aktualna debata člonow zwjazkowneho předsydstwa“ měli stajny wobstatk posedženja być.
5. Čłonojo zwjazkowneho předsydstwa maja prawo, temy za „aktualnu debatu“ hač do 3 dźělowych dnjow do posedženja zwjazkowneho předsydstwa na zarjad Domowiny pisomnje zapodać. Wo dalšich a pozdžišich namjetach smě so we wotwisnosći časowych móžnosćow na městnje posedženja rozsudzić.
6. Nimo toho smě kóždy člon zwjazkowneho předsydstwa do schwalenja dnjowneho porjada próstwu wo wuzamknjenje zjawnosće při wobjednanju wěsteho dypka dnjowneho porjada stajić. Wo próstwyje wothłosuje so po § 7 wotrězki 7 do 9.
7. Čłonojo zwjazkowneho předsydstwa su winowaci, wo wšitkich w njezjawnym dźělu posedženja wobjednaných naležnosćach mjelčeć.
8. Rjadne posedženja zwjazkowneho předsydstwa zwoła předsyda Domowiny na zakładze schwaleneho lětneho plana dźěławosće.
9. Wurjadne posedženje zwoła so wot předsydy po pisomnym žadanju znajmjeńša štwórciny člonow zwjazkowneho předsydstwa, třoch towarstwow abo prezidija (hlej wustawki Domowiny artikl 9, dypk 7). Wone ma so w běhu dweju tydženjow přewjesć.
10. Přeprošenje z namjetom za dnjowy porjad a předłohami posedženja ma kóždy rjadny člon zwjazkowneho předsydstwa najpozdžišo 7 dnjow do wuradźowanja dóstać. Jeli sej to adresat přeje, móža so jemu podložki tež digitalnje sposrědkować. Wo naležnosćach, kiž njejsu w připóslanym namjeće za dnjowy porjad zapisane, smě so jenož potom wuradźować a rozsudzić, hdyž njeda so naležnosć přestorčić a zwjazkowe předsydstwo wobjednanju přihłosuje.
11. Přeprošenje z namjetom za dnjowy porjad a předłohami posedženja dóstawaja tež hłowna jednaćelka a jednaćel, nawodnica Rěčneho centruma WITAJ, jeje zastupjer a referenća zarjada Domowiny.  
Samsne płaci za předsydu rewizijneho wuběrka a předsydu změrcowskeho wuběrka, jeli sebi to přejetaj.
12. Podložki zjawneho dźěla posedženja dóstanu tež županojo a předsyda sobustawskich towarstwow, kotřiž njejsu z člonom zwjazkowneho předsydstwa, jeli sebi to přeja.
13. Podložki njezjawneho dźěla posedženja dóstanu wosoby po § 5 dypk 11.

14. Posedženja zwjazkowego předsydstwa přewjedu so po móžnosći realnje na postajenej městnosći.
15. Posedženja přewjedu so po artiklu 6, wotrězk 6 wustawkow pak realnje, po elektroniskim puću (na příklad přez telefon abo widejowu konferencu) abo w měšanej formje z přítomnymi kaž tež z wobdžělnikami přez widejowu konferencu, druhe medije abo telefon.
16. Wobdžělenje na widejowej konferency, přez druhe medije abo telefon je po artiklu 6, wotrězk 7 wustawkow Domowiny jenož z legitimaciskimi a přistupnymi datami móžne, kotrež za wotpowědne posedženje płaća. Daty so we wosebitej mejlce sčasom do zhromadźizny sposrědkuja.

## § 4

### Nawjedowanje posedženjow

1. Posedženja nawjeduje předsyda, w padže jeho zadžěwanja městopředsydaj. Za wobjednanje jednotliwych dypkow dnjoweho porjada móže prezidij druhich zamołwitych zasadzić.
2. Předsyda a městopředsydaj tworja posedženski prezidij. Nawoda posedženja konsultuje so we wažnych prašenjach nawjedowanja posedženja a dodžerženja wustawkow Domowiny kaž tež jednanskeho porjada zwjazkowego předsydstwa z dalšimaj člonomaj posedženskeho prezidija. Wonaj měłoj nawodže posedženja ze swójskeho wida na předpisane postupowanje skedźbnić, je-li trěbne. Hewak jeho při nawjedowanju posedženja podpěrujetaj.
3. Nawoda posedženja ma slědowace nadawki:
  - posedženje zahajić a přítomnych powitać,
  - přizjewić, zo so wotběh zjawneho džěla posedženja natoči a zo njesu žane dalše natočenja dowolene,
  - přizjewić, zo so zjawny džěl posedženja digitalnje jako livestream do syće wusyla,
  - přítomnosť a zamołwjenja zwěsćić,
  - wobzamknjenjakmanosć zwěsćić,
  - zajatosć zwěsćić,
  - wo dnjowym porjedže wothłosować dać,
  - diskusiju k jednotliwym dypkam nawjedować a z wobsahowym rezimejom zakónčić,
  - konkretny tekst wobzamknjenja do wothłosowanja předčitać resp. posłowny namjet za wobzamknjenje sformulować abo přeformulować,
  - wo předłohach a druhich namjetach k wobzamknjenju wothłosować dać,
  - rezultat wothłosowanja zwěsćić (tři kategorije: za namjet/za naraženje, přećiwo namjetej/pšešiwo naraženju a so hłosa wzda/so głosa wzda),
  - přiwrzaće abo wotpokazanje namjeta zwěsćić,
  - wo wokolnym abo listowym wothłosowanju naležnosće rozsudzić dać,
  - wo wjacorych čitanjach wěstyh předłohow rozsudzić dać,

- wo wotsadženju dypkow dnjowego porjada resp. wo wróćodaću předłohow k dalšemu wobdźěłanju w prezidiju abo džěłowych wuběrkach rozsudzić dać,
- porjadny wotběh posedženja na zakładze jednanskeho porjada zawěšćić a domowe prawo wukonjeć,
- wo wobsahach k wozjewjenju w medijach rozsudzić dać a
- posedženje zakónčić.

## § 5

### Wobdźělenje na posedženjach

1. Čłonojo zwjazkowego předsydstwa su winowaci, so na posedženjach wobdźělić. W padže zadžěwanja su winowaci, předsydu abo sekretariat zarjada Domowiny do posedženja wo tym informować.
2. Lisćina za wupłaćenje posedženskich pjenjow płaci zdobom jako lisćina přitomnosće. Kóždy člon zwjazkowego předsydstwa zapisa so ze swojim podpismom do lisćiny přitomnosće a wupjelni lisćinu za zarunanje jězbnych wudawkow, jeli spjelni k tomu trěbne wuměnjena po płaciwym rjadowanju.
3. Čłonojo zwjazkowego předsydstwa smědza so digitalnje na posedženju wobdźělić.
4. Digitalne wobdźělenje zapisa předsyda do lisćiny přitomnosće.
5. Člon zwjazkowego předsydstwa, kotryž chce posedženje dočasnje wopušćić, ma to nawodže posedženja zdžělić.
6. Po artiklu 9, dypk 3 wustawkow Domowiny mataj so hłowna jednaćelka a jednaćel na posedženjach zwjazkowego předsydstwa z poradźowacym hłosom wobdželeć. Samsne přitrjechi za nawodnicu Rěčneho centruma WITAJ a jeje zastupjerja, tematizuja-li so kubłansko-politiske prašenja. Nowinski rěčnik, referentka za naležnosće třěšneho zwjazka a referentka za gremijowe a ministerialne naležnosće so tohorunja na posedženjach wobdžela.
7. Předsyda rewizijnego wuběrka kaž tež předsyda změrcowskeho wuběrka mataj po artiklu 9, dypk 3 wustawkow Domowiny prawo, so na wuradźowanjach zwjazkowego předsydstwa z poradźowacym hłosom wobdželeć.
8. Zastupjer Domowiny we FUEN-prezidiju ma prawo, so z poradźowacym hłosom na posedženjach zwjazkowego předsydstwa wobdželeć.
9. K zjawnym posedženjam ma kóždy zajimc přistup. Zajimcy pak nimaja prawo, do jednanjow zapřimnyć abo wotběh posedženja mylić.
10. Na njezjawnym džělu wobdžela so čłonojo zwjazkowego předsydstwa, hłowna jednaćelka a jednaćel, referentka za naležnosće třěšneho zwjazka, referentka za gremijowe a ministerialne naležnosće kaž tež protokolantka / protokolant ze zarjada. Rjadowanja § 7, dypk 13 nastupajo zajatosće maja so dodžeržeć. Jeli sej maćizna předwidžaneho dypka to žada, smědza so dalše wosoby na njezjawnym džělu

přeprošyc. Na njezjawnym džělu smětaj so tež předsyda rewizijnego wuběrka a předsyda změrcowskeho wuběrka wobdžělic, hdyž wo to prosytaj.

## § 6

### Wobdžělenje na diskusiji

1. Čłonojo zwjazkoweho předsydstwa a prezidija, hłowna jednaćelka, jednaćel a wobdžělnicy po § 5 dypki 6 do 9 tutoho porjada, kaž tež přeprošeni hosćo maja prawo, so słowa jimać, hdyž jim nawoda posedženja słowo přepoda. Kóždy diskutant mět so jenož dwójce k samsnej naležnosći wuprajic. Słowo so po rjedže přizjewjenow přepodawa. Wo řečenskim prawje njeprošenych hosći rozsudzi posedženski prezidij.
2. Čłon zwjazkoweho předsydstwa, kiž chce k jednanskemu porjadej porěćec, přizjewi to ze zběhnjenjom wobeju rukow. Wón dóstanje potom hnydom słowo.
3. Hdyž wuprajitej so žadanje abo namjet k wothłosowanju, smětej zasadnje jedyn čłon zwjazkoweho předsydstwa za to a jedyn přećiwo tomu řećec. Potom so wothłosuje.
4. Řečny čas móže so wot posedženskeho prezidija po potřebnosći wobmjezować. Hdyž so hižo k wěcy njerěči, ma nawoda posedženja prawo, řečnikej słowo sćazać.
5. Jednanski porjad dowola čłonom zwjazkoweho předsydstwa w běhu posedženja sćěhowace namjety:
  - wróćenje naležnosće do prezidija, do džěłoweje skupiny resp. do džěłoweho wuběrka abo na Domowinski zarjad, zo by so předłoha k tomu přihotowała resp. předležaca předłoha so předžěłała,
  - wotsadženje naležnosće z dnjoweho porjada resp. přestorčenje wobjednanja,
  - wokolne wothłosowanje po posedženju, ručež předleži předžěłany namjet za wobzamknjenje,
  - zakónčenje diskusije k naležnosći,
  - wothłosowanje wo předložce resp. wo namjeće k wobzamknjenju,
  - přetorhnjenje abo zakónčenje posedženja,
  - wuzamknjenje zjawnosće,
  - žadanje za tajnym wothłosowanjom abo za wothłosowanjom po mjenje,
  - naprašowanje wěcywustojnych wosobow a
  - přepodaće połnomocy k doskónčnemu rozsudej prezidijej, předsydze abo zarjadej Domowiny.
6. Čłon zwjazkoweho předsydstwa, kotryž je so k diskusiji přizjewił a njeje zakónčeneje diskusije dla wjace słowo dóstał, smě swój přinošk pisomnje předsydze zapodać. Přinošk so protokolej připožži.
7. Do wothłosowanja wo předłohach a namjetach za wobzamknjenje smě kóždy čłon zwjazkoweho předsydstwa wosobinske wujasnjenje wotedać. K tomu přepoda jemu nawoda posedženja po wotpowědnym přizjewjenju słowo. Tajke wosobinske wujasnjenje smě jenož poprawa wopačnych wuprajenow abo wotwobaranje wosobinskeho nadběha wobsahować.

## § 7 Wothłosowanja a wobzamknjenja

1. Po artiklu 6, dypk 3 wustawkow Domowiny je zwjazkowe předsydstwo kmane k wobzamknjenju, hdyž je wjace hač połojca jeho člonow přítomna.
2. Namjet je přiwzaty, hdyž je wjetšina přítomnych hłosakmanych za namjet hłosowała, dalokož njeje to w tutym porjedže abo we wustawkach hinak postajene. Při samsnej ličbje hłosow za abo přečiwo namjetej je namjet wotpokazany.
3. K wothłosowanju dóstanje kóždy člon hłosowanske kartki (zelenu kartku z napismom "za namjet/za naraženje", čerwjenu kartku z napismom "přečiwo namjetej/pšešiwo naraženju" a bělu kartku z napismom "so hłosa wzdám/so głosa wzdám").
4. Wotedate hłosy digitalnje přizamknjenych člonow zwěsći nawoda posedženja z pomocu wobrazowki. Za čas wothłosowanja a wuličenja dyrbi wosoba, kotraž wothłosuje, na wobrazowce widžeć być. Jeli njeje wosoba widžeć abo njeda so wotedaty hłós přirjadować, so tutón njeliči.
5. Namjet k wobzamknjenju dyrbi pisomnje abo ertnje jasnje sformulowany być, prjedy hač so wo nim wothłosuje.  
Wo kóždym namjeće so jednotliwje wothłosuje.  
Hdyž předleža wjacore namjety k wobzamknjenju nastupajo samsnu naležnosć, potom wothłosuje so najprjedy namjet, kiž po wobsahu najbóle wotpowěduje zaměrej wobzamknjenja.
6. Signalizuje-li jedne sobustawske towarstwo z pisomnym wopodstatnjenjom w předpolu posedženja k namjetej za wobzamknjenje sylne wobmyslenja, ma so předsydstwo tutoho towarstwa do wothłosowanja słyšeć. Słyšenje předsydstwa tutoho towarstwa so přewjedže w zwjazkowym předsydstwje.
7. Wothłosuje so zasadnje zjawnje ze zběhnjenjom hłosowanskeje kartki.
8. Hdyž sebi to jedyn člon zwjazkowego předsydstwa žada, potom so po mjenje abo tajnje wothłosuje.  
Předležitej wobaj namjetaj, potom so tajnje wothłosuje.  
Při wothłosowanju po mjenje předčita nawoda posedženja mjena wotpowědneho člona zwjazkowego předsydstwa, kiž dyrbi potom wuprajić, hač wón "za namjet" abo "přečiwo namjetej" hłosuje resp. so hłosa wzda. To so we wotpowědnej lisćinje dokumentuje a protokolej přida.  
Člonojo zwjazkowego předsydstwa, kiž njesu wobzamknjenju přihłosowali, smědža sej žadać, zo so to w protokolu naspomni.
9. Po artiklu 6, dypk 4 wustawkow Domowiny móže zwjazkowe předsydstwo tež po pisomnym puću rozsudy tworíc. Wo tym ma zwjazkowe předsydstwo abo prezidij rozsudzić. Namjet je přiwzaty, hdyž je so znajmjeńša połojca člonow organa na wothłosowanju wobdžěliła a wjetšina hłosakmanych za namjet hłosowała, chibazo wustawki něšto drugeho postajeja.

10. Hdyž so wuměňjenja za płaćiwe wobzamknjenja zasadnje změnja, móže so wotpowědne prašenje znova w zwjazkowym předsydstwje wobjednać. Při tym ma so wo tym rozsudzić, hač so dotalne wobzamknjenje zběhnje.
11. Wólby a personalne rozsudy přewjedu so w tajnym wothłosowanju. Smě so zjawnje wolić, hdyž njeje žadyn člon zwjazkowneho předsydstwa přećiwo tomu.  
Wolena je zasadnje wosoba, kotraž dóstanje wjace hač połojcu hlasow wšitkich člonow zwjazkowneho předsydstwa.  
Při wjacorych mjenach na jednym wólbny m lisćiku, su ći wuzwoleni, kotřiž su po rjedže najwjac hlasow dóstali. Při runosci hlasow ma so wuša wólba přewjesć.  
Woleny je potom tón, kiž docpěje we wušej wólbje wjetšinu hlasow.
12. Tajne, listowe wólby su móžne. Wo tym ma zwjazkowe předsydstwo abo prezidij rozsudzić.
13. Člonojo zwjazkowneho předsydstwa njesmědža so na wobjednanju a schwalenju naležnosćow wobdželić, hdyž móže wobzamknjenje jim wosobinsce, jich swójbny m resp. přiwuznym přěnjeho stopjenka abo institucijam, kiž woni juristisce zastupuja, bjezposredne lěpšiny abo njelěpšiny přinjesć.  
Potrjecheny člon zwjazkowneho předsydstwa dyrbi sam swoju zajatosć do wobjednanja wotpowědneje naležnosće přizjewić. Wón smě so w padže zjawneho džěla posedženja k hosćom sydnyć, w padže njezjawneho džěla pak dyrbi posedžensku rumnosć wopušćić.  
Hdyž wobsteja dwěle na zajatosći resp. njezajatosći, potom rozsudzi so w njeprítomnosći potrjecheneho.  
To samsne płaći za wšitkich dalších prítomnych abo digitalnje prítomnych.

## § 8

### Protokol zjawneho džěla posedženja

1. Wo kóždym zjawnym posedženju zdžěla so protokol wobzamknjenjow. Jako pomocny srědk za protokolowanje zjawneho džěla posedženja wužiwa so natočenje.
2. Protokol zjawneho džěla ma wobsahować:
  - termin, městnosć, započatk a kónc wuradžowanja,
  - mjeno nawody/nawodow zeńdženja,
  - prítomnosć člonow a hosći,
  - dnjowy porjad,
  - čisla a titule wobjednaných předłohow,
  - wobzamknjenja z formulaciju namjeta, z wuslědkom wobhłosowanja a z běžnym čisłom tuteje wólbneje doby,
  - nadawki, kiž su so druhim gremijam přepodali,
  - wosobinske stejišćo, hdyž sej to člon zwjazkowneho předsydstwa žada a
  - teksty rozprawow k bytosnym naležnosćam jako přidawk k protokolaj.
3. Člonojo zwjazkowneho předsydstwa a jeho stajni hosćo dóstanu w běhu jednoho tydženja po posedženju na digitalnym puću naćisk protokola a smědža k protokolaj.



poklwy abo korektury zapodać. Doskónčny naćisk přepoda so z podložkami za přichodne posedženje.

4. Županojo a předsydzá sobustawskich towarstwow, kiž njejsu z člonom zwjazkowneho předsydstwa, dóstanu protokol k informaciji, jeli sebi to přeja. Samsne plaći za předsydu rewizijného wuběrka a předsydu změrcowskeho wuběrka.
5. Protokol a spjelnjenje wobzamknjenow kontroluja so na přichodnym zjawnym wuradźowanju zwjazkowneho předsydstwa.

## § 9

### Protokol njezjawneho džěla

1. Wo kóždym njezjawnym posedženju zdžěla so wuslědkowy protokol. Jako pomocny srědk za protokolowanje njezjawneho džěla posedženja smě so natočenje wužiwać, kotrež ma so po wopodstatnjenju protokola zničić.
2. Wobzamknjenja njezjawneho džěla maja so ze separatnym běžnym čislowanjom protokolować ("n" před čisłom).
3. Wobsteji móžnosć jednotliwe wuprajenja po słowje do protokola přewzać.
4. Sobustawam změrcowskeho wuběrka ma so na žadanje protokol pod dohladom w zarjedže spřistupnić.
5. Protokol njezjawneho džěla kontroluje so na přichodnym posedženju zwjazkowneho předsydstwa.

## § 10

### Předłohi

1. Předłohi do zwjazkowneho předsydstwa smědža zapodać:
  - prezidij,
  - předsyda a městopředsydaj Domowiny,
  - člonoj zwjazkowneho předsydstwa,
  - džělowe wuběrki resp. džělowe skupiny,
  - rewizijny a změrcowski wuběrk Domowiny,
  - předsydstwa sobustawskich župow a towarstwow, kaž tež
  - zarjad Domowiny a
  - Rěčny centrum WITAJ.
2. Předłohi zdžělaja so, hdyž so trěbnosć wobjednanja wotpowědneho prašenja ze stron wolenych gremijow třěšneho zwjazka, předsydstwow sobustawskich župow a towarstwow kaž tež zarjada Domowiny zwěsći, hdyž zwjazkowe předsydstwo wotpowědny nadawk wobzamkne abo posedženski plan zwjazkowneho předsydstwa to předwidzi.

3. Předlohi měli so zasadnje prezidijej k předwobjednanju přepodać, zo by móht zwjazkowemu předsydstwu doporučenje k doskónčnemu wobjednanju předlohow přepodać. Referentka za naležnosće třěšneho zwjazka rjaduje, čisluje a spřístupni, resp. wozjewi předlohi we wothłosowanju z prezidijom.
4. Za přihotowanje předlohow ma so wosebity formular wužiwać (hlej přiłoha).  
Kóždy předloha dóstanje swoje čisło (běžne čisło + lětoličba).  
Předlohi, kiž so w prezidiju na zakładže § 6, dypk 5, smužka 10 abo § 12, dypki 2, 4 abo 5 tutoho jednanskeho porjada dorozsudža, dóstanu před běžnym čisłom přidawk "P".  
Předlohi, kotrež so w zwjazkowym předsydstwje doskónčnje wobjednawaja a schwala, dóstanu přidawk "ZP".  
Wobě družinje předlohow so separatnje ličitej a skladujetej.  
Wopodstatnjenje za namjet k wobzamknjenju přida so we wotpowědnej přiłoze.
5. W předlohach, kiž služa jenož k informaciji, zapisa so do rubriki "Namjet za wobzamknjenje" pasus, zo so informacija na wědomje bjerje.
6. Financne wuskutki wobzamknjenjow maja so mjenować a zarjad Domowiny měł financujomnosć do wobjednanja w prezidiju pruwować a z podpismom hłowneje jednaćelki, jednaćela abo referenta za hospodarske a infrastrukturelne naležnosće wopodstatnić.
7. Hdyž so w běhu jednanjow zwjazkowneho předsydstwa wotčilacy namjet k wobzamknjenju sformuluje, potom zapisa so nowa formulacija do přehlada předlohow.

## § 11

### Wutworjenje džělowych wuběrkow

1. Zwjazkowe předsydstwo abo prezidij wutworitej po potrebjce k analytiskemu a koncepcionelnemu wobdžěłanju naležnosćow džělowe wuběrki. Kóždy wuběrk měł ze znajmjeńša 5 wosobow wobstać, wjetšina z nich měła być z čłonom zwjazkowneho předsydstwa. Postaja so zestawa a nawoda džěloweho wuběrka, jeho naměstnik, po wobsahu přislušny zamołwity zarjada, wobsahowe zaměry džělawosće a doba skutkowanja.
2. Wuběrki maja prawo, stajíc próstwu wo juristisku poradu na prezidij.
3. Za wotběh posedženjow džělowych wuběrkow plaća w zasadže postajenja jednanskeho porjada zwjazkowneho předsydstwa wotpowědnje. Wuradžowanja wuběrkow su zasadnje njezjawne. Wuwzaća su móžne.  
Čłonom zwjazkowneho předsydstwa a prezidija je přistup w kóždym času móžny.
4. Protokole wuradžowanjow džělowych wuběrkow dóstanu nimo wuběrkownikow tež čłonojo prezidija. Čłonojo zwjazkowneho předsydstwa smědža sebi protokole požadać.

5. Jako členojo džělowych wuběrkow móža so nimo členow zwjazkowego předsydstwa a prezidija dalši zastupjerjo župow a towarstwow kaž tež fachowcy powołać. Woni podleža samsnemu rjadowanju dowěrliwosće kaž členojo zwjazkowego předsydstwa.
6. Wuběrki rozprawjeja zwjazkowemu předsydstwu abo prezidijej prawidłownje wo rezultatach a džělawosći swojeho skutkowanja a předpołoża wotpowědne namjety jako předłohi k wobjednanju a schwalenju.
7. Předsydža wuběrkow smědža na zakładze naprašowanjow medijow abo po swójskim rozsudze wuběrkownikow zjawnosć k tematiskim čěžiščam njezjawnych posedženjow wuběrkow informować. Při tym ma so wobkedźbować, zo ma so jednać wo powšitkowne informacije džělawosće wuběrkow, nic pak wo naćiskach, kiž ma zwjazkowe předsydstwo dodiskutować a wobzamknyć.

## § 12

### Prezidij

1. Po artiklu 10, dypk 1 wustawkow Domowiny slušeja do prezidija předsyda Domowiny, jeho městopředsyda a dalšej členaj zwjazkowego předsydstwa, kotrejuž na namjet předsydy zwjazkowe předsydstwo powoła.
2. Po artiklu 10 dypkaj 3 a 4 wustawkow Domowiny postaji zwjazkowe předsydstwo slědowace zamołwitosće prezidija:
  - a. přihotować wobsahowje posedženja zwjazkowego předsydstwa,
  - b. poradźować zwjazkowe předsydstwo we wobsahowych a wažnych organizatoriskich prašenjach a k tomu předpołóžiť trěbne předłohi,
  - c. poradźować předsydu Domowiny w jeho běžnej džělawosći,
  - d. wutworić w nadawku zwjazkowego předsydstwa nachwilne džělowe skupiny resp. wuběrki a jich džěło koordinować,
  - e. poradźować předsydu a jednaćelstwo při koordinaciji běžneje džělawosće zarjada Domowiny a Rěčneho centruma WITAJ a přijimać k tomu trěbne informacije,
  - f. přihotować hlowne zhromadźizny Domowiny a nawjedować wudžělanje rozprawy wo zwoprawdženju nadawkow džělowych směrnicy zwjazkowego předsydstwa a
  - g. rozsudzić wo slědowacych prašenjach:
    - chwatnje trěbne stejišća Domowiny k naćiskam prawnskich předpisow a k aktualnym prašenjam,
    - stejišća Domowiny k předewzaćam regionalneho planowanja,
    - delegowanje kulturnych skupin w nadawku Domowiny, projekty kulturneje wuměny a službne jězby čestnohamtskich zastupjerjow Domowiny do wukraja,
    - koncepty za róčnicy a jubileje,
    - naprawy w zwisku z wobhospodarjenjom imobilijow Domowiny,
    - nadawki k prawniskej poradze Domowiny,

- kónčna redakcija za stejišća, rezolucije, memorandumy a podobne wozjewjenja Domowiny, kiž so w zjawnosći rozšěrjeja (brošurki, stejišća, rezolucije, memorandumy a podobne).
  - wobdželenje Domowiny na projektach druhich nošerjow,
  - koncepty za wopomnjenske dny,
  - z běžneje džělawosće třěšneho zwjazka wotwodžene nadawki za džělowe wuběrki zwjazkowego předsydstwa.
3. Zwjazkowe předsydstwo informuje so na kóždym posedženju wo džělawosći prezidija a dóstanje pisomny přehlad rozudow posedženjow prezidija z podložkami za swoje přichodne posedženje.
  4. Posedženja prezidija su zasadnje njezjawne. Čłonojo zwjazkowego předsydstwa smědža so na posedženjach wobdželeć. Čłonojo zwjazkowego předsydstwa maja prawo, prezidijej namjety za wobjednanje naležnosćow zapodać.
  5. Džělawosć prezidija rjaduje wosebity jednanski porjad, kiž zwjazkowe předsydstwo schwali.

### § 13

#### **Winowatosće čłonow zwjazkowego předsydstwa**

1. Nimo aktiwneho wobdželenja na posedženjach zwjazkowego předsydstwa ma čłon zwjazkowego předsydstwa wosebite winowatosće napřećo župje resp. towarstwu, kotraž/kotrež je jeho za wólby do zwjazkowego předsydstwa nominowała/o. Wón ma předsydstwo župy resp. towarstwa prawidlownje wo jeho skutkowanju informować, předłohi w předpolu posedženjow z nimi diskutować, wobzamknjenja zwjazkowego předsydstwa rozkłasć a jich přesadženje podpěrować.
2. Wobzamknjenja su za kóždého čłona zwjazkowego předsydstwa jenak zwjazowace. Žadyn čłon zwjazkowego předsydstwa nima po wotumje wjetšiny gremija prawo, přesadženje wobzamknjenjow blokować a napřećiwne aktiwity přewjesć.
3. Hdyž zwjazkowe předsydstwo postaji, zo njesmě so wo wěstych prašenjach zjawnje informować, ma kóždy čłon gremija winowatosć k mjelčenju. Tuta winowatosć wobsteji hač do wuwjazanja na zakładže rozsuda zwjazkowego předsydstwa. Winowatosć k mjelčenju płáći bjez wobmjezowanja za personalne daty.
4. Kóždy čłon zwjazkowego předsydstwa je k aktiwnemu zjawnostnemu džělu namołwjeny.

### § 14

#### **Zjawnostne džěło**

1. Zjawnosć a žurnalisća přeprašuja so z nowinskim wozjewjenjom a z nawěškom na zjawne wuradžowanja zwjazkowego předsydstwa.

2. Dnjowy porjad zjawneho džěła so najpozdžišo 3 džěłowe dny do posedženja w serbskej a němskej rěči w interneće wozjewi.
3. Podložki zjawneho džěła posedženja wozjewja so w zapodatej rěči tohorunja najpozdžišo 3 džěłowe dny do posedženja na internetnej stronje Domowiny. Z toho wuwzatej stej rozprawa předsydy a rozprawa prezidija Domowiny. Wo dalšich wuwzacach smětaj zwjazkowe předsydstwo a prezidij rozsudzić.
4. Wobzamknjenja zjawneho džěła posedženjow zwjazkowego předsydstwa maja so w běhu jednoho tydženja na internetnych stronach Domowiny wozjewić.
5. Po posedženju zhotowi nowinski rěčnik medijowe wozjewjenje wo hłownych ćežiščach a wuslědkach zeńdženja.  
Po wothłosowanju z jednym čonom prezidija posrědkuje so tute redakcijam, čonom zwjazkowego předsydstwa a dalšim zajimowanym adresatam.  
Zdobom ma so wone na internetnej stronje Domowiny wozjewić.
6. Rozsudny interneho resp. dowěrliwego razu, kotrež njesmědža so wozjewić, so na posedženju konkretnje pomjenuja.

Dalokož so w tutym jednanskim porjedže funkcije a pomjenowanja po muskim abo žónskim splahu wopisuja, měni so z tym runohódnje žónski a muski splah.

*Jednanski porjad zwjazkowego předsydstwa za wólbnu dobu 2021-2025 schwali so na posedženju zwjazkowego předsydstwa dnja 25.11.2022 a nabudže z tym plaćiwosć.*

Příloha 1 – předloha**DOMOWINA****Předloha č. ZP .../...****za ... (rjadne) posedženje Zwjazkowneho předsydstwa Domowiny dnja ... w ...**

---

**Zapodačel/-ka předlohi:****Awtor/-ka předlohi:****Nastupa (předmjet wuradźowanja):**Slěd wobjednanja předmjeta předlohi:

gremij resp. organ Domowiny	datum	wuslědk wuradźowanja resp. doporučenje

**Namjet za wobzamknjenje:****Zwjazkowe předsydstwo Domowiny wobzamkne:****Tekst wobzamknjenja.**

datum:

.....  
podpismo zapodačelaFinancne wuskutki wobzamknjenja: zjimanje/wopisowanje finančnych wusutkowFinancujomnosť je so pruwowała: (datum a podpismo jednačelstwa, resp. referenta)Wuslědk wothłosowanja:

za namjet:

přećiwo namjetej:

hłosawzdaće/a:



# DOMOWINA

**Předłoga cysło ZP .../.....  
za ... (pórědne) pósejženje Zwězkowego předsedarstwa Domowiny  
dnja ..... w .....**

---

**Zapódař předłogi:**

**Awtor předłogi:**

**Nastupnosć (předmjat wobradowanja):**

Slěd wobjadnanja předmjata předłogi:

gremij resp. organ Domowiny	datum	wuslědk wobradowanja resp. dopóručenje

**Naraženje za wobzamknjenje:**

**Zwězkowe předsedarstwo Domowiny wobzamknjo:**

datum:

.....  
pódpismo zapódarja

Financne wustatkowanja wobzamknjenja:

Financujobnosć jo se pšepytowała: (datum a pódpismo referenta resp. jadnarja)

Wuslědk wótgłosowanja:

za naraženje:

pšešiwu naraženju:

głosa zdžaržanje/-i/-a::

Příloha 2 – časowe doby gremijow



**DOMOWINA**

**Rjadowanja w jednanskimaj porjadomaj Zwjazkowego předsydstwa Domowiny a jeho prezidija nastupajo časowe doby.**

Čas	Naprawa	Žórto
7 dnjow do posedženja P	Podložki maja so do póšty dać.	
5 dnjow do posedženja P	Maja podložki člonam prezidija předležec.	§ 5 (10) JP-P
9 dnjow do posedženja ZP	Podložki maja so do póšty dać.	
7 dnjow do posedženja ZP	Podložki maja člonam ZP předležec.	§ 3 (10) JP-ZP
	Podložki so za člonow Zwjazkowego předsydstwa přez cloud k dispoziciji staja.	§ 3 (10) JP-ZP
tydžeň do posedženja ZP	Informacije na medije wo zjawnym džělu posedženja	§ 3 (1) JP-ZP
hač do 3 džělowe dny do posedženja ZP	Móžnosć za čłony Zwjazkowego předsydstwa, temy za "aktualnu debatu" zapodać.	§ 3 (5) JP-ZP
hač do 3 dny do posedženja ZP	Dnjowy porjad posedženja ZP so serbsce a němsce w interneće wozjewi.	§ 14 (2) JP-ZP
	Podložki zjawneho džěla posedženja wozjewja so na internetnej stronje Domowiny. Z toho wuwzatej stej rozprawa předsydy a rozprawa prezidija Domowiny.	§ 14 (3) JP-ZP
hač do 3 hodžiny do posedženja	Zwjazkowemu předsydstwu ma so link k posedženju sposrědkować.	§ 3 (16) JP-ZP
do posedženja	Čłonojo Zwjazkowego předsydstwa maja zarjad Domowiny abo předsydu wo zadžětanju informować.	§ 5 (1) JP-ZP
	Čłonojo Zwjazkowego předsydstwa maja digitalne wobdžělenje přizjewić.	§ 5 (3) JP-ZP
	<b>Posedženje Zwjazkowego předsydstwa</b>	
do schwalenja dnjoweho porjada	Čłon zwjazkowego předsydstwa smě próstwu wo wuzamknjenje zjawnosće při wobjednanju wěsteho dypka dnjoweho porjada stajić.	§ 3 (6) JP-ZP
po posedženju	Nowinski rěčnik zhotowi medijowe wozjewjenje wo hłownych čěžiščach a wuslědkach zeńdženja. (posrědkowanje z mailku a na internetnej stronje)	§ 14 (5) JP-ZP
tydžeň po posedženju	Protokol so člonam ZP a hosćom zjawneho džěla digitalnje sposrědkuje.	§ 8 (3) JP-ZP
	Wobzamknjenja zjawneho džěla posedženja maja so na internetnych stronach wozjewić.	§ 14 (4) JP-ZP
lěto po posedžeńju	Znajmjeńša lěto ma livestream sřístupny być.	§ 3 (1) JP-ZP